

## CART DAN' BZOJ POSTLW SAN PABLO CHE BENE' CA' ŽE' ROMA

**1** <sup>1</sup> Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'. <sup>2</sup> Diosen' ba gwzologüe' bzende' benachen' diža' güen che', bene' cont gwnita' bene' goso'e xtižen' cani' na' bozozojen'. <sup>3</sup> Na' diža' güen che Diosen' chzejni'in chio' che Xi'ine' Xancho Jesucriston'. Len' golje' benach lo diaža che da' rey David. <sup>4</sup> Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'. <sup>5</sup> Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' nación yosozenague' che Diosen'. <sup>6</sup> Can' naquen, Diosen' ba gwleje' le'e cont nacle lo na' Jesucriston'.

<sup>7</sup> Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuesle binlo len xbab da' yo'o lo' yichjlažda'olen'.

### **Pablon' goclaže' šjane'e bene' ca' chesejnilaže' Jesucriston' ciuda Roma**

<sup>8</sup> Zgua'tec ni'a le'e Jesucriston' zoe' chaclene' neda' cont choa' yela' choxclen che Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'. <sup>9</sup> Nezcze Diosen' yogo' ni'a cate' choł güiža'ne' chnaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che Xi'ine' Jesucriston'. <sup>10</sup> Chnaba' lao Diosen' gone' latje yedena'a le'e še ca' chnalaže' gona', le ba chac sša zelaža' yida'. <sup>11</sup> Chaclaža' yedena'a le'e na' gwzejni'ichda' le'e cont soachachle šejnilaže'le Diosen'. <sup>12</sup> Na' le'e len neda' soacho gonchachlaže' lježcho dan' chejnilaže'cho Jesucriston'.

<sup>13</sup> Bene' migw, che'nda' nezele zan ni'a ba goclaža' yida' yedena'a le'e, perw biña' gac yedena'a le'e. Chaclaža' yida' gona' xšin Diosen' gan zoale cont šanle gwzenagle che Jesucriston' ca ba goc yezica'chle yež ga ba gwy'a. <sup>14</sup> Nežda' cheyała' gua' diža' güen che Jesucriston' len yogo'loł bene', bene' že' ciudadan', na' bene' že' yixe', na' bene' chesac letr na' bene' cbi chesac letr. <sup>15</sup> Da'n'an' che'nchgüeda' gua' xtižen' len le'e že'le Roman' can' ba bian' ga yoble.

### Diža' güen che Jesucriston' nsan' yela' guac che Diosen'

<sup>16</sup> Bi cheto'eda' gua' diža' güen che Jesucriston', le xtižen' nsan' yela' guac che Diosen' cont bene' chesejle' chen gata' yela' mban chegaque' toli tocane. Nsan' yela' guac len neto' bene' Israel, na' lecze len le'e bi nacle bene' Israel. <sup>17</sup> Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban che' toli tocane."

### De xtoła' benachen'

<sup>18</sup> Diosen' zoe' yaban' na' ba blo'ede' benachen' toli tocane yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesaclaže' yesombia' bene' yoble diža' li che Diosen'. <sup>19</sup> Na' Diosen' gone' yezaca'zi'e, le ba zjanezde' zoe' da' ba blo'ede' legaque' can' ba benen'. <sup>20</sup> Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' benach chesele'ede' da' ca' ba bene'. Da'nan' bibi de da' yosode'e benachen' yesene' bi zjanezde' še zoe'. <sup>21</sup> La'czla' zjanezde' zoa Diosen', bi chesonxene' le', neca cheso'e yela' choxcen che'. Xbab chegaquen' bibi zacan' na' zjancho| yichjlažda'ogüen' yela' bi chejle' chegaquen'.

<sup>22</sup> Chesene' zjanaque' bene' sina' perw chesone' xbab da' bibi zaca'.

<sup>23</sup> Chosozoe' Diosen' to šla'ale la'czla' naque' la'zelagüe' bene' zaca' na' zoe' toli tocane. Na' gualaz le', chesejnilaže' no l' gua'a lsaca' che benach bene' te che, na' no l' gua'a lsaca' che be zoa xil, che be žia tap ni'a na'ba' na' che no be xigüe'.

<sup>24</sup> Da'nan' Diosen' ba gwlejyichje' legaque' cont chesone' da' xinj can' ža lo' lažda'ogaquen', na' bale' ba chesonchgüe' da' nac yela' zto' len cuerp chegaquen' toe' len yetoe'. <sup>25</sup> Diosen' gwlejyichje' legaque' cont chesone' yela' zto', le legaque' gosebejyichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' cheyala' šejnilaže'cho na' gonxencho toli tocane. Ca'czen' gacšca.

<sup>26</sup> Da'nan' Diosen' gwlejyichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole bene' bich chesone' can' cheyala' yeson no'olen', san cheseque'e ljež no'olgaque' cont chesone' len legaque' da' bi cheyala' yesone'. <sup>27</sup> Na' nita' bene' byo bene' bitw chese'nde' yesenita'lene' no'ole, san chesezelaže' ljež bene' byogaque' nach cheseca'a lježe' cont chesone' yela' zto'. Na' dan' ba chbiayi' cuerp chegaquen', naquen castigw da' cheyala' yesezi'e yela' güen da' xinj chen'.

<sup>28</sup> Bi chesaclaže' benachen' yosozenague' che Diosen', da'nan' ba gwlejiyichje' legaque' len xbab mal chegaquen'. Da'nan' nite' chesone' da' bi cheyala' yesone'. <sup>29</sup> Chesonchgüe' yogo' da' xinj. Bene' byo chesata'lene' no'ole bi nac no'ol chegaque', na' no'olen' chesata'lene' bene' byo bi nac bene' chegaque'. Chesexi'e bene'. Chesezelaže' bi da' de che bene'. Zjanaque' bene' xi'a juisyw, chesegue'e lježe', chesot lježe', chesedile', cheseziye'e, zjanacchgüe' bene' güedenag, na' chja'aque' chjaseleje' diža' che bene'. <sup>30</sup> Chesene' mal che bene' yoble, chesegue'ede' Diosen', na' bibi bala'an chesezoe' bene' yoble. Chesa'laže'. Chesonxen cuine' cheso'e diža' zjanaque' bene' güen. Chesaljlaže' bichle da' mal da' yesone'. Bi chosozenague' che xaxne'e. <sup>31</sup> Bi chesejni'ide'. Bi chesone' da' ba gosene' yesone'. Bi chesacde' bene' yoble. Bi chesyexi'xen che lježe' na' bi chesyeyaše' lježe'. <sup>32</sup> Zjanezde' Diosen' že' toli tocane yesezaca'zi' ben' cheson da' ca'. Na' la'czla' zjanezde' can' že', con nita'cze' chesone' da' xinjen' na' chesyebede' cate' bene' yoble chesone' can' cheson legaquen'.

### Diosen' zejcz'e to licha da' chone' castigw che xtoła'chon'

**2** <sup>1</sup> Še nacho che bene' yoble da' xinjen' chone', bibi zaca' ye'cho Diosen' gague bi xtoła'cho de, note'tez naccho. Cate' chnecho che da' chon bene' yoble, na' cheyechjen chio', le toz can' choncho len da' cheson legaque'. <sup>2</sup> Nezecho še choncho da' xinj ca' nac da' ca' ba gwnian', Diosen' gone' cont saca'zi'cho che xtoła'chon' na' zejcz'e to licha da' gone' ca'. <sup>3</sup> ¿Chaquale Diosen' bi gone' da' saca'zi'cho cate' chnecho che da' xinj da' chon bene' yoble na' chontecho can' chesone'na'? Bi cheyala' gaguecho bi gone' da' saca'zi'cho, le gonczen'. <sup>4</sup> ¿Bi chacbe'ele Diosen' nacchgüe' bene' šagüe' na' bene' xenlaže' len chio' napcho dola' na' chone' ca' cont gacbe'echo da' xinjen' choncho na' yetinjechon? <sup>5</sup> Le'e bi chetinjele xtoła'len' nacle bene' yid, na' chonle cont Diosen' ža'ache' le'e na' gonche' ga saca'zi'le cate' žin ža' chogbi'e che benachen'. Cana' gwlo'e zejcz'e to licha can' chogbi'en saca'zi' to to benach che xtoła'gaquen'. <sup>6</sup> Na' cana' to tocho saca'zi'cho o gone' ga gac güen checho con ca' nac da' ba bencho. <sup>7</sup> Na' še cheyiljwlaže'cho nac goncho cont šjayzoacho len Diosen' toli tocane, na' cont yebe Diosen' chio', na' cont gone' gacchcho bene' zaca', soacho goncho da' güen bite'teze da' gwžaglaecho. Nach Diosen' gone' cont bancho toli tocane. <sup>8</sup> Na' še zoacho choncho con da' chazlaže'cho na' bi chzenagcho diža' li che Diosen', san zoacho chzenagcho che da' malen', Diosen' ža'ayichje' chio' na' gone' ga saca'zi'cho toli tocane. <sup>9</sup> Yogo' benach bene' chon da' xinj saca'zi'e na' žaglagüe', zgua'tec žagla'o neto' bene' Israel na' tech yezica'chle bene'. <sup>10</sup> Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binlo len xbab

dan' yo'o lo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

<sup>11</sup> Toz ca chon Diosen' len yogo'lol benach. <sup>12</sup> Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'. <sup>13</sup> Gague con yenecho can' ža leyna' cont Diosen' ne' naccho bene' güen len le', san goncho can' žanna', nach Diosen' ne' naccho bene' güen len le'. <sup>14</sup> Bene' bi zjanac bene' Israel na' bi zjanombi'e ley dan' bzoj Moisésen', tgüeje lo' lažda'ogaquen' chonen cont chesone' da' güen can' ža leyna' cheyała' yesone', na' la'czla' bi zjanombi'e leyna' dan' zoa yichjlažda'ogaquen' chžian bia' yesone' da' güen, naquen ca to ley len legaque'. <sup>15</sup> Nacbia' zjanezde' lo' lažda'ogaque' cheyała' yesone' da' ca' nžia bia' leyna' yesone', le chesone' late' güejen. Na' zjanezde' lo' yichjlažda'ogaquen' še da' chesone' naquen güen o še naquen mal. <sup>16</sup> Can' gac caten' žin ža Diosen' gone' lo' na' Jesucriston' choglagüen' che to tocho ca nac xbab chechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen che Jesucriston'.

#### **Bene' Israel bi chesone' can' ža' leyna'**

<sup>17</sup> Na' le'e nacle bene' Israel gualaž chia', šeca chonle xbab zoale binlo len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'. <sup>18</sup> Nezele bin' chazlaže' Diosen' na' chacbe'ele bin' nac da' güen na' bin' nac da' mal, le nsedle xtižen'. <sup>19</sup> Chaquele zaca'le cont co'ole be'ni' lo' yichjlaždao' bene' bi nombia' Diosen'. <sup>20</sup> Na' chaquele guac gwzejni'ile bene' cheson clele nac cheyała' yesone', na' chaquele guac gwsed gwlo'ele bene' cobe xtiža' Diosen', le nombia'le diža' li chen' na' len nsan' doxen da' cheyała' nezele. <sup>21</sup> Le'e chsed chlo'ele bene' yoble, žbixchen' bi chsed chlo'e cuinle? Le'e žale bi cheyała' no cuan, žbixchen' chbanle? <sup>22</sup> Le'e žale nono gata'len no'ole bi nac no'ol che', na' no'olen' bi gata'lene' ben' bi nac bene' che', žbixchen' chonle da' che'le bene' bi gone'? Le'e chgue'ele l gua'a lsaca' da' chesejnilaže' bene' žbixchen' chjalanle bi da' de lo' yo'o gan' že' l gua'a lsaca' ca'? <sup>23</sup> Cha'laže'le da' nsedle ley da' bzoj Moisésen', perw chzoale Diosen' to šla'ale da' bi chonle can' ža leyna'. <sup>24</sup> Chac can' nyoj Xtiža' Diosen' žan: "Da' chonle da' xinj, bene' bi zjanac bene' Israel chesene' mal che Diosen'."

<sup>25</sup> Še choncho can' ža leyna' zaca'czen dan' ba gwzoacho señw lo' cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho señw dan' nzi' circuncisión. <sup>26</sup> Bene' bi naque' bene' Israel bi zoe' seña', na' še chone' can' ža ley che Diosen', Diosnan' ne' naque' txen len chio' zoacho seña'. <sup>27</sup> Na' bene' cheson can' ža leyna', la'czla' bi zjanaque' bene' Israel na' bi

zjazoe' señw dan' nzi' circuncisión lo cuerp chen', chesone' cont nacbia' de xtoła' le'e nsedle leyna' perw bi chonle can' žanna'. <sup>28</sup> Bi nacho nacccho dogualje bene' Israel da' na'ocho costumbr che nación chechon' na' dan' zoa señw lo cuerp chechon'. <sup>29</sup> Naccho dogualje bene' Israel gague dan' choncho can' ža leyna' da' nyojen, san da' chejniłaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'nān' Diosen' güe'e diža' güen checho, la'czła' še notno chne güen checho.

**3** <sup>1</sup> ¿Bi da' güen da' chga'an che chio' bene' Israel da' goljcho lo diaža che da' xozxta'ochon' še ca'? ¿Bi da' güen da' chga'an da' ba zoacho señw da' nzi' circuncisión? <sup>2</sup> Da' xen da' chga'an. Na' da' blaoch da' chga'an, Diosen' bnežjue' da' xozxta'ocho ca' Xtižen' da' nyojen par yogo' benach. <sup>3</sup> Na' la'czła' zan bene' gualaž checho bi gosejle'e chen, bi nacho Diosen' bi gone' güen can' gwne' gone' len chio' naccho nación che'na'. <sup>4</sup> Goncze' con can' že'na'. Yogo' nī'a Diosen' chne' diža' li, la'czła' še žin ža cate' yogo'lol bene' yesene' diža' güenlaže'. Chac can' nyoj Xtiža' Diosen' žan:

Le' gwlo'edo' benachen' le cho'o diža' li.

Na' ca nac bene' ca' cheson xbab bi chono' can' žon', yesacbe'ede' chonczo' can' žo'na'.

<sup>5</sup> Bał bene' chesene' cate' choncho da' xinj chlo'en ca bene' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'. <sup>6</sup> Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' benach. Perw gonczen'.

<sup>7</sup> Na' nita' bał bene' chesone' xbab clele, chesene': "Cate' choe'cho diža' güenlaže' chlo'en ca bene' güen juisyw nac Diosen' da' cho'e pur diža' li. Da'nān' bi cheyała' ne' napcho doła' cate' chonlaže'cho." <sup>8</sup> Lecze chesonlaže' bał bene' chesene' neda' bzejni'ida' guaque goncho da' mal cont gac da' güen. Da' cheyała'cze gon Diosen' cont sacazi' note'tez bene' ža ca'.

### Yogo'cho napcho doła' lao Diosen'

<sup>9</sup> ¿Bixen' ša? ¿Naquech chio' bene' Israel bene' güench ca bene' bi zjanac bene' Israel? Bi naccho ca'. Ba bzejni'ida' toz ca nac che chio' bene' Israel len che bene' bi zjanaque' bene' Israel, yogo'cho de xtoła'cho.

<sup>10</sup> Na' Xtiža' Diosen' nyojen žan:

Nono zoa bene' zej to licha, ne toe'.

<sup>11</sup> Nono nla' bene' chejni'i cont gwzenague' che Diosen', nono nla' bene' cheyljue' le'.

<sup>12</sup> Yogo' benach ba zjanque'e nez mal.

Yogüe' ba zjanaque' ca to da' bibi zaca'.

Ne to nono zoa bene' chone' da' güen.

<sup>13</sup> Len xtiža'gaquen' chesexoayague' bene'.

Ca zban chla' cho'a ba che bene' guat še bi nyeyjon binlo, ca' zban chla' xtiža'gaquen'.

Na' ca venen che bel znia nac xtiža'gaquen' da' cheso'e.

<sup>14</sup> Pur diža' mal diža' bya' že' cho'agaquen'.

<sup>15</sup> Con bize da' chosode'ede' cont chesote' bene'.

<sup>16</sup> Gate'teze chja'aque' zjanse'e yela' yaše' yela' zi' ca nac da' chesone'.

<sup>17</sup> Bi chesezoe' binlo len lježe'.

<sup>18</sup> Bi chesežebe' Diosen' len bi da' mal chesone'.

<sup>19</sup> Na' nezecho Diosen' bene' chio' bene' Israel ley chen'. Da'nana' ne tocho bi chac nacho bibi xtoła'cho de, le bi choncho can' žanna'. Nachen' Diosen' že' si'cho castigw che xtoła'chon', con can' že' che yogo' benach, le yogüe' bi chesone' can' ža ley chen'. <sup>20</sup> Bi nacho zoa bene' naque' bene' güen len Diosen' da' chone' yogo' da' ža leyna', le notno chon ca'. Leyna' chlo'en chio' naccho bene' güen da' xinj.

### **Bene' šejnilaže' Jesucriston' gague' bene' güen len Diosen'**

<sup>21-22</sup> Na' na'a Diosen' ba blo'e can' goncho cont gaccho bene' güen len le', na' bich bi že' che da' ca' ža leyna' cheyała' goncho, san že' cheyała' šejnilaže'cho Jesucriston' cont gaccho bene' güen len le'. Doxen Xtiža' Diosen' dan' nyojen cani'te chzejni'in cheyała' šejnilaže'cho Jesucriston' cont gaccho bene' güen. Na' toz can' chon Diosen' len yogo'lol benach. <sup>23</sup> Le yogo'cho ba bencho da' xinj, na' ne tocho bi naccho bene' güen can' chaclaže' Diosen' gaccho. <sup>24</sup> Perw na' Diosen' nži'ilaže'de' chio', na' gague bi chzi'e par že' naccho bene' güen len le', le Cristo Jesús'en' ba bnitlagüe' xtoła'chon'. <sup>25</sup> Diosen' gwsele' Jesucriston' bnežjw cuine' gosote'ne' neche xtoła' benach. Na' note'teze bene' yesejnilaže'ne' nitlao xtoła'gague'. Diosen' gwsele'ne' cont nacbia' zeje' to licha da' gwdape' yela' chxenlaže' bezi'xene' xtoła' bene' ca' gwnita' cani' bene' gosejnilaže'ne'. <sup>26</sup> Na' lecze gwsele'ne' cont nacbia' zeje' to licha da' že' che yogo' chio' chejnilaže'cho Jesús'en' naccho bene' güen.

<sup>27</sup> Bi cheyała' gonxen cuincho güe'cho diža' naccho bene' güen. Šaca' choncho doxen dan' ža leyna' zaca' gonxen cuincho güe'cho diža' naccho bene' güen, perw nono chon can' ža leyna'. Con da' chejnilaže'cho Jesucriston', da'nana' zaca' cont yeyaccho bene' güen len Diosen'. <sup>28</sup> Can' naquen, note'tez bene' chejnilaže' Jesucriston', Diosen' že' naque' bene' güen len le' da' chejnilaže'ne', gague lagüe dan' chone' can' ža leyna'.

<sup>29</sup> ¿Chaquale Diosen' naque' Dios che chio' naccho bene' Israel ngaze? Lecze naque' Dios che bene' bi zjanac bene' Israel. <sup>30</sup> Le toze Diosen' zoa na' len' že' che yogo'cho naccho bene' güen len le' con še chejnilaže'cho Jesucriston', na' toz can' chone' len chio' zoacho señw dan' že' circuncisión na' len bene' cbi zjazoa señwna'. <sup>31</sup> ¿Chaquale choncho leyna' ca to da' bibi zaca' da' žacho cheyaccho bene' güen len Diosen'

cate' chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

### Can' ben da' Abraham

**4** <sup>1</sup> Na' le'e bene' gualaž chia' len le'e bi nacle bene' Israel, da' xozxta'oto' Abraham ÷bixe nacho che'? <sup>2</sup> Šaca' Abrahanna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'. <sup>3</sup> Quinga ža Xtiža' Diosen' da' nyojen: "Abrahanna' gwejni'laže' Diosen' na' da'nan' Diosen' gwne' naque' bene' güen len le'." <sup>4</sup> Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjuen'. <sup>5</sup> San to goclen chon Diosen' že' che chio' chejni'laže'chone' naccho bene' güen len le', le bi choncho da' güen. Choncho da' xinj, na' Diosen' chnitlagüe' da' xinj chechon' še chejni'laže'chone'. <sup>6</sup> Lecz da' Davin' be'e diža' ca mba chzoa ben' chnitlao Diosen' xtolen' na' bibi cuent chone' še ba ben ben' da' güen o ba bene' da' mal. <sup>7</sup> Bzoj Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bñitlagüe' xtoła'chon'.

<sup>8</sup> Mba zoacho še Diosen' že' checho bibi xtoła'cho de.

<sup>9</sup> ¿Chaquale neto'zen' zoato' señw dan' že' circuncisión gac soato' mba can' gwnen'? Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gwejni'laže'ne'. <sup>10</sup> Gwne' che da' Abrahanna' naque' bene' güen len le' cate' bina' soe' señw dan' že' circuncisión, gague beyož gwzoen'na' gwne' ca'. <sup>11</sup> Na' gwdechle gwzoe' señwna' cont gwnezde' Diosen' bñitlagüe' xtole' da' ba chejni'laže'ne'. Na' da'nan' Abrahanna' naque' xozxtao' yogo' bene' chesejni'laže' Diosen' cont nitlao xtoła'gaquen' la'czla' bi zjazoe' señwna'. <sup>12</sup> Na' lecze naque' xozxtao' neto' bich bi xtoła'to' de da' chejni'laže'to' Diosen', neto' zoato' señw dan' že' circuncisión. Perw gague naque' xozxta'oto' da' zoato' señwna', san da' chejni'laže'to' Diosen' can' gwejni'laže' da' Abrahanna' le'.

### Diosen' bene' güen len da' Abrahanna' da' gwejni'laže'ne'

<sup>13</sup> Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejni'laže'ne'. Da'nan' gwna Diosen' naque' bene' güen gague da' bene' can' ža leyna'. <sup>14</sup> Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejni'laže'cho Diosen' šeca', na' bibi zejen da' gwne' gone' güen len bene' za' yesalje lo diaža' che da' Abrahanna'. <sup>15</sup> Na' leyna' nsan' castigw che benachen', le bi chesone' can' žanna. Šaca' bibi ley de da' gwžian bia' bi da' cheyała' gon chio' benach, bibi xtoła'cho de šeca'.

<sup>16</sup> Can' naquen, note'teze bene' chesejnilaže' Diosen', none' legaque' ca xi'in diaža che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to ley da' bzoj da' Moisésen' gac cheto' yežlion'. Na' nacczen da' li gon Diosen' güen len note'tez bene' chejnilaže'ne'. Na' gone' ca' cont gacbia' to goclen chone' len bene' ca' chesejnilaže'ne' can' gwejnilaže' da' Abrahanna' le'. Na' da' non Diosen' cuent Abrahanna' naque' ca xozxtao' yogo' chio' chejnilaže'chone', <sup>17</sup> chac can' gože' da' Abrahanna' gwne': "Ba nzoa' le' gaco' xozxtao' bene' še' nación zan." Dios ben' gwejnilaže' da' Abrahanna' nape' yela' guac cont yosbane' bene' guat, na' chac chone' cont gac da' bina' gac.

<sup>18</sup> Abrahanna' bi gwnezde' nac gac can' gwna' Diosen' gac, san con gwzoe' gwejle'e che Diosen' na' gwzoe' lez gon Diosen' cont nita' bene' zan xi'in diaža' che'. <sup>19</sup> Gwzoacze' gwejle'e can' gož Diosen' le' la'czla' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž. <sup>20</sup> Gwzoateze' gwejnilaže' Diosen' na' bi gocžejlaže' len da' gož Diosen' le' gone', san gwzoachache' gwejnilaže'ne' na' benxene'ne'. <sup>21</sup> Abrahanna' gwnezde' Diosen' nape' yela' guac cont gone' can' gwnen'. <sup>22</sup> Da'nan' Diosen' gwne' naque' bene' güen da' gwejnilaže'ne'.

<sup>23</sup> Na' dan' nyojen žan Diosen' gwne' naque' bene' güen da' gwejnilaže'ne', gague nyojen ca' che Abraham na'zen'. <sup>24-25</sup> Lecze nyojen che yogo'cho, le Diosen' lecze že' naccho bene' güen len le' da' chejnilaže'chone'. Cont gwnitlagüe' xtola'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejnilaže'cho bechis bosbane'ne' ladjo bene' guat ca' cont beyone' chio' bene' güen.

### Zoacho binlo len Diosen' da' chejnilaže'cho Jesucriston'

**5** <sup>1</sup> Na' ca nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'nan' ba zoacho binlo len le'. <sup>2</sup> Da' chejnilaže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'. <sup>3</sup> Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwchejecho cate' de bichle da' saca'zi'cho. <sup>4</sup> Na' še chonxenlaže'cho cate' chzaca'zi'chon', chlo'en zoachachcho chejnilaže'cho Diosen'. Na' še zoachachcho chejnilaže'chone', nezecho šjayzoacho txen len le'. <sup>5</sup> Na' dan' zoacho lez šjayzoacho txen len Diosen', bi nacho naquen to da' güenlaže' chaquecho gac checho ca'. Le Diosen' ba gwsele' Spiritw chen' zoan len chio' na' chnen lo' lažda'ochon' žan chacgüe Diosen' chio'.

<sup>6</sup> Chio' benach naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston'



bnežjw cuine' gote' neche chio' napcho dola'. <sup>7</sup> Nono zoa bene' gwnežjw cuine' yesot bene' le' neche bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šagüe'. <sup>8</sup> San Diosen' blo'ede' chacchgüede' chio' da' gwsele' Criston' gote' neche chio' la'czla' zoacho choncho da' xinj. <sup>9</sup> Na' dan' got Criston' neche chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lol' bene'. <sup>10</sup> Cana' bi gwzoacho binlo len Diosen'. Perw Xi'ine' Criston' bnežjw cuine' gote' neche chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'. <sup>11</sup> Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

### Adánna' gwleque' da' mal yežlio nga, san Jesucriston' gwleque' da' güen

<sup>12</sup> Yela' güedenag che bene' nechw ben' le Adán gwxe da' malen' yežlio nga, na' da' malen' nsan' yela' got. Can' goc, gwzolao chesat yogo' benachen', le yogo'lol' chesone' da' mal. <sup>13</sup> Benachen' gwzolao chesoncze' da' xinjen' cate' gwzoate da' Adán, la'czla' bina' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj. <sup>14</sup> Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lol' gosate' can' chesat bene' ža na'aža. La'czla' legaque' bi gosone' güedenag len to da' gož Diosen' legaque' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen sela' Diosen', len' bxie' yela' mban toli tocane.

<sup>15</sup> iNža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' benach gatcho lagüe da' ben Adánna' da' xinjen', san yogo' chio' benach guac soacho mba da' nži'i Diosen' benachen' na' gwsele' Xi'ine' Jesucriston' cont chaclene' note'tezcho. <sup>16</sup> Toz Adánna' bi bzenague' che Diosen' na' da'nan' Diosen' gwne' yesezaca'zi' yogo'cze benachen' toli tocane che xtola'gaquen'. Nach Diosen' gwsele' toz bene' güen cont bnitlagüe' xtola' note'tezcho chejnilaže'chone' na' beyone' chio' bene' güen la'czla' da' zan da' xinj ba bencho. <sup>17</sup> De yela' got che chio' benach neche da' xinj da' ben toz ben' gože' Adán, san mbalaz juisyw chac che chio' benach neche da' güen da' ben Jesucriston' bnežjw yela' mban che' neche yogo'cho. Diosen' nži'ide' chio', nachen' bibi chchixjue' chonze' chio' ca bene' güen še chejnilaže'cho Jesucriston', na' none' chio' yela' mban toli tocane cont nabia'cho txen len Jesucriston'.

<sup>18</sup> Can' naquen, da' ben toz Adánna' da' xinj, Diosen' gwchogbi'en saca'zi' yogo' benachen' che xtola'gaquen'. Na' neche da' güen da' ben toz

Jesucriston' da' bnežjw cuine' gosote'ne', da'nan' nitlao xtolā' note'tezcho chejnilaže'chone', cont none' chio' ca bene' güen. <sup>19</sup> Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' benäch. Na' da' bzenag Jesucriston' che Diosen' na' bnežjw cuine' cont nitlao xtolā' benächen', da'nan' note'tezcho chejnilaže'chone' none' chio' ca bene' güen.

<sup>20</sup> Cate' Diosen' bnežjue' ley chen' da' bzoj Moisésen' na' gwcha'o gw Xench da' xinj da' goson benächen', le bi bosozenague' chen. Perw na' la'czla' gwcha'o gw Xen da' malen', gwcha'o gw Xench yela' ži'ilaže' che Diosen' len chio' benäch. <sup>21</sup> Can' chac, de yela' got che yogo' chio' benäch da' naccho bene' chon da' xinj, ca'cze Diosen' nži'ide' yogo' chio' benäch cont note'tezcho gaccho bene' güen len le' na' gata' yela' mban checho toli tocane še šejnilaže'cho Xancho Jesucriston'.

**Bi cheyala' soacho goncho da' xinj san soacho goncho can' chazlaže' Criston'**

**6** <sup>1</sup> ¿Nacxen' cheyala' goncho na'a ba nezecho nži'ilaže' Diosen' chio'?  
¿Gonchcho da' malen' cont yezi'xenchcze Diosen' che chio'?

<sup>2</sup> Gague can' goncho. Cate' gwzolao chejnilaže'cho Criston' bich goclaze'cho nabia' da' malen' chio'. Da'nan' guac nacho ba gotcho len da' xinjjen cont bich gonchon. <sup>3</sup> ¿Bi chacbe'ele can' zejen da' gwzoacho nis? Zejen da' chejnilaže'cho Jesucriston' ben' got neche chio', bach naccho ca to bene' guat len da' xinjjen' cont bich gonchon. <sup>4</sup> Na' dan' gwzoacho nis lecze guac nacho bgaše'cho can' bosocuaše' Criston'. Na' con can' bechis bosban Xancho Diosen' Criston' ladjo bene' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

<sup>5</sup> Na' can' žacho ba gotcho len da' xinjjen' dan' chejnilaže'cho Criston', lecze guac nacho bechis bosban Diosen' chio' can' bechis bosbane' Criston', le ba bocobe' yichjlažda'ochon'. <sup>6</sup> Cana' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neche chio', ba none' chio' ca to bene' guat len da' xinjjen' cont bich gonchon na' cont da' mal dan' yo'o lo' yichjlažda'ochon' bich soan nabian' chio'. <sup>7-8</sup> Bene' ba got bich zoe' chone' da' xinj, na' ca' nacczen len chio' chejnilaže'cho Criston', bich che'necho nabia' da' malen' chio' na' bich zoacho chzenagcho chen. Na' chejle'cho gone' cont soacho bancho len le' na'a na' tolli tocane. <sup>9</sup> Na' nezecho Criston' beyas bebane' ladjo bene' guaten' na' gwbat gate' da' yoble le bich soe yela' goten' le'. <sup>10</sup> Na' cate' gosote' Criston', tñi'aze bnežjw yela' mban che' neche xtolā'chon'. Bich chyažjen gwnežjw cuine' da' yoble, san ba zoalene' Diosen' chone' con bi da' chazlaže' Diosen'. <sup>11</sup> Nach dan' gote' neche xtolā'chon', cheyala' soacho goncho cont da' mal dan' yo'o lo' yichjlažda'ochon' bich nabian'

chio', na' cheyała' soacho txen len Xancho Jesucriston' cont goncho dan' chazlaže' Diosen'.

<sup>12</sup> Da'nan' bi güe'cho latje nabia' da' malen' cuerp chechon' dan' nac da' gat na' goncho bi da' xinj da' selažen'. <sup>13</sup> Bi cheyała' gon cuincho lo na' da' gwxiyen' cont goncho da' mal len cuerp chechon'. Cheyała' gon cuincho lo na' Diosen' cont goncho da' güen. Guac nacho Diosen' bechis bosbane' chio' ladjo bene' guaten' da' bocobe' yichjlažda'ochon'. <sup>14</sup> Bich nabia' da' malen' chio', le nezecho Diosen' chbede' chio' gague neche da' choncho can' ža ley dan' bzoj da' Moisés, san dan' naque' bene' šagüe'.

**Bene' chzenag che da' malen' naque' ca bene' zoa xan, bene' chnabia' le' cont gonche' da' malen'**

<sup>15</sup> ¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyała' goncho? Bitw goncho ca'. <sup>16</sup> Nezecho še ba chzenagcho che to bene' cont goncho bite'tez že', choe'cho latje chnabi'e chio'. Na' ca'cze naquen len chio' še chzenagcho che da' malen' na' chontezchon, ba chnabia' da' malen' chio' še ca'; na' bi gac šjayzoalencho Diosen' toli tocanē še ca' choncho. San še zoacho chzenagcho che Diosen', nachen' zejczcho choncho da' güen na' šjayzoalencho Diosen' toli tocanē. <sup>17</sup> Na' choa' yela' choxcen che Diosen' na'a ba chzenagle do yichj do laže'le xtiža' Diosen' da' ba bzejni'ito' le'e, na' bich chzenagle che da' malen' can' benle cana'. <sup>18</sup> Diosen' ba bebeje' le'e lo' da' malen' na' ba ben cuinle lo ne'en cont soale gonle da' güen.

<sup>19</sup> Ba bzejni'ida' le'e bia' diža' che bi da' chac che chio' benach cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp chelen', na' benchgualē da' malen', lecze can' cheyała' gon cuinle lo na' Diosen' gonle da' güen cont chazlaže' Diosen' can' chonlen'. <sup>20</sup> Caten' ne' zejcho choncho da' malen' bi chzenagcho che Diosen' neca choncho da' güen. <sup>21</sup> Na' bibi banez na' le'echo che da' mal ca' ba bencho, san na'a ba cheto'echo chen. Bene' ca' ne' chesontezē da' malen' gata' castigw chegaque' toli tocanē. <sup>22</sup> Na' chio', Diosen' ba bebeje' chio' lo da' malen' na' yo'ocho lo ne'ena'. Da'nan' zejch choncho da' güen can' chazlaže' Diosen' na' šjayzoacho len le' toli tocanē. <sup>23</sup> Še zoacho choncho da' xinjen', gata' castigw checho toli tocanē cate' gatcho. San Diosen' chondadze' chio' to da' güen juisyw, chio' chejnlaže'cho Xancho Jesucriston', chone' cont šjayzoacho len Diosen' toli tocanē.

**Naccho ca to bene' ba got len ley da' bzoj Moisésen'**

**7** <sup>1</sup> Bene' migw, da' nga žia' le'e, le nombia'le ley dan' bzoj Moisésen'. Nezczecho con bene' ca' zjamban cheyała'cze yosozenague' che leyna'. <sup>2</sup> Ca to no'ole nšagna', šlac mban bene' che' cheyała' soalene' le', le can' chon leyna' mandadw gone'. Na' še ba got bene' chen', cana' ba bele' len leyna' da' chon mandadw soalene' bene' chen'. <sup>3</sup> Še no'olen' soalene'

bene' yoble šlac ne' mban bene' chen', nape' dolā' len leyna' da' chzoa xtoe'. Perw na' še ba got bene' chen', leyna' žan ba guac yošagna'lene' bene' yoble na' bi nacho chone' da' xinj yošagne'e.

<sup>4</sup> Bene' migw, can' naquen len chio' chejnilaže'cho Criston'. Ba belacho len leyna' da' žan saca'zi'cho che xtoła'chon' toli tocane. Na' ba gwnitlao xtoła'chon' dan' bnežjw Criston' yela' mban chen' gosote'ne' le'e yag cruzen'. Da'nan' ba zoacho txen len Criston' ben' beban ladjo bene' guaten', na' zoacho cont goncho can' chazlaže' Diosen'. <sup>5</sup> Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nsan' castigw checho toli tocane cate' gatcho.

<sup>6</sup> Perw na'a ba belacho len ley da' žan cheyała' si'cho castigw toli tocane, le Criston' beque'e xtoła'chon'. Na' ba chaclaže'cho goncho can' chazlaže' Diosen', na' chonchon gague cont na' Diosen' naccho bene' güen len len', san chonchon dan' ba bocobe Spiritw chen' yichjlažda'ochon'.

### Bi güe'cho latje nabia' da' malen' chio'

<sup>7</sup> Bi cheyała' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyała' gona' cont gocbe'eda' chona' da' xinj. Na' gwnezda' naquen mal chzelaža' bi da' de che bene', le leyna' žan: "Bi selaže'le bite'teze da' de che bene'." <sup>8</sup> Na' cate' gwnezda' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj. <sup>9</sup> Neda' gwzoa' to tiemp bi gocbe'eda' bi cheyała' selaža'. Perw cate' bžin ža gwnezda' nžian bia' bi cheyała' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'nan' gwnezda' cheyała' sia' castigw che xtołan' toli tocane. <sup>10</sup> Leyna' nyojen cont gwzenagcho chen' na' gata' yela' mban checho toli tocane, perw da' bi bzenaga' chen, bzejni'in neda' gata' castigw chia' toli tocane. <sup>11</sup> Can' goc, cate' bembia' leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtołan' toli tocane.

<sup>12</sup> Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to licha. <sup>13</sup> ¿Nachó leyna' da' naquen güenchguan' chonen cont saca'zi'cho che xtoła'chon' toli tocane? Bi nac len. Da' mal da' yo'o lo' yichjlažda'ochon' bi ben' latje goncho can' cheyała' goncho, na' da'nan' gwchoglaon checho saca'zi'cho che xtoła'chon' toli tocane. Leynan' da' nac da' güen chlo'en chio' Diosen' chgue'echgüede' da' mal da' choncho.

<sup>14</sup> Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj.

<sup>15</sup> Bi choncho da' güen da' chaclaže'cho goncho, san da' xinj da' chgue'echo lelen' choncho. Bi chacbe'echo bixchen' choncho ca'. <sup>16</sup> Na'

dan' chgue'echo da' mal dan' chonchon', zejen chacbe'echo nac leyna' güen. <sup>17</sup> Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

<sup>18</sup> Nezecho bi naccho bene' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. <sup>19</sup> Bi choncho da' güen da' chaclaže'cho goncho, san choncho da' xinj da' bi che'necho goncho. <sup>20</sup> Da'nān' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

<sup>21</sup> Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon. <sup>22</sup> Lo' yichjlažda'ochon' chbecho goncho can' ža ley che Diosen', <sup>23</sup> perw chacbe'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

<sup>24-25</sup> ¡Nyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjen'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nān' si'cho castigw toli tocanē. Choxcān Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

### Spiritw che Diosen' chonen chio' yela' mban toli tocanē

**8** <sup>1</sup> Na' na'a da' ba naccho txen len Cristo Jesúsēn', bich gata' castigw checho toli tocanē, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'. <sup>2</sup> Cate' ne' zoacho chontezcho da' malen' nchoglaon checho si'cho castigw che xtoła'chon' toli tocanē, perw na'a Spiritw che Diosen' ba benen chio' yela' mban toli tocanē da' chejnilaže'cho Cristo Jesúsēn' na' Spiritw chen' chnabian' yichjlažda'ochon'. Da'nān' bich saca'zi'cho toli tocanē. <sup>3</sup> Ley da' bzoj Moisésēn' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goccze cuerp chen' ca cuerp che chio' bene' güen da' xinj. Na' Jesucriston' bnežjw cuine' neche xtoła'chon' cont da' malen' bich nabian' chio' len xbab da' yo'o lo' yichjlažda'ochon'. <sup>4</sup> Diosen' gwsele'ne' cont soacho goncho da' güen can' ža ley chen' cheyała' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

<sup>5</sup> Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. <sup>6</sup> Le še zoacho chebecho da'

malen', nachle si'cho castigw toli tocanē, na' še chebecho da' ca' chazlaže' Spiritw che Diosen', guata' yela' mban checho toli tocanē na' soa cuezcho binlo len xbab dan' yo'o lo' yichjlažda'ochon'. <sup>7</sup> Choncho ze bene' chgue'e Diosen' cate' chebecho da' malen', le cate' chebecho da' malen' bi chazlaže'cho neca chac gwzenagcho che ley chen'. <sup>8</sup> Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.

<sup>9</sup> Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnlaže' Criston'. (Spiritw che Criston' lecze naquen Spiritw che Dios.) <sup>10</sup> Perw na' še ba zoa Criston' len chio', Diosen' že' naccho bene' güen len le' na' lecze šjayzoacho len le' toli tocanē la'czla' yesat cuerp chechon' neche da' malen' dan' de yežlion'. <sup>11</sup> Diosen' bechis bosbane' Cristo Jesús en' ladjo bene' guaten', na' lecze gwžin ža cate' Diosen' yechis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

<sup>12</sup> Da'nan' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'. <sup>13</sup> Le še soacho gwzenagcho che da' mal dan' yo'o lo' lažda'ochon', saca'zi'cho toli tocanē. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocanē.

<sup>14</sup> Na' note'tezcho še chzenagcho che dan' chzejni'i Spiritw che Diosen' chio', naccho xi'in Dios. <sup>15</sup> Diosen' bene' chio' Spiritw chen' caten' gwque'e chio' ca xi'ine'. Da'nan' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san chol güižchone', che'chone': “Xa”. <sup>16</sup> Na' lecze Spiritw chen' chnen lo' lažda'ochon' cont nezecho naccho xi'in Dios. <sup>17</sup> Na' da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

<sup>18</sup> Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'. <sup>19</sup> Diosen' bene' beñach, bene' beyixe', len bica'chle da' zjade. Na' yogo'cho len bichle da' ca' bene' zoacho lo' juisyw chbezcho batcan' gon Diosen' gacchgua mba che chio' naccho xi'ine'. <sup>20</sup> Na' yogo' da' ca' ben Diosen' bich zjanacšagüen'. Na' gague con to gualazen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' beñach. Na' txen chbezcho gone' cont gac checho binlo. <sup>21</sup> Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac

che Criston', le canan' lecze yesyeyacšagüe' da' ca' cont bich te chegaquen. <sup>22</sup> Nezecho ža na'aža yogo' da' ca' ben Diosen' chesežaglaon ca to no'ole bene' chzan. <sup>23</sup> Na' gague da' ca'ze chesežaglaon, san lencze chio' benach chžaglaochon na' chbežgüe'cho. Ba ben Diosen' chio' Spiritw chen' cont nezecho gwžin ža gaguech güen checho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. <sup>24</sup> Cate' Diosen' bene' yela' mban checho toli tocanē gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc. <sup>25</sup> Na' še bina' le'echo da'na' chbezcho gac, cheyala' cuezcho gaquen sin cbi chjaxaque'laže'cho.

<sup>26</sup> Na' Spiritw che Diosen' chaclenen chio', le bi nezecho can' cheyala' goncho yol güižcho Dios, san Spiritw che Diosen' chacbe'en cate' con chebanecho na' cate' bi cheželecho diža' da' güe'lencho Diosen', nach chnen gualazcho len diža' da' bi chejni'icho. <sup>27</sup> Na' Dios ben' chna' chgüie' yichjlaždao' yogo'cze bene', chejni'ide' bin' chaclaže' Spiritw chen' cate' chnen gualazcho, le ba gwleje' chio' naccho lo ne'e. Na' con da' chaclaže' Diosen' chnab Spiriton' lagüen'.

#### Diosen' de'e chio' na' da'nan' nono soe chio'

<sup>28</sup> Na' nezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwналаže'. <sup>29</sup> Cate' bina' galjcho Diosen' gwnezde' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo'cho na' chio' gaccho ca biše' lježe' bi' xcuide'ch. <sup>30</sup> Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' bene' güen len le' na' bene' cont gacchgua güen checho txen len Jesucriston' yaban'.

<sup>31</sup> iCatec güenna' chon Diosen' len chio' ba bsi'e xnezen' gac checho yogo' da' ca'! Len' de'e chio', nachen' notno soe chio'. <sup>32</sup> Diosen' bi bžone' saca'zi Xi'ine' Jesucriston', san gwsele'ne' cont yeque'e xtoła'chon'. Da'nan' nezecho yebede' gone' chio' yogo' bite'tez da' yažjecho. <sup>33</sup> Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuış chio' lagüen', le ba gwne' bibi xtoła'cho de. <sup>34</sup> Nono zoa no gac gon cont na Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo bene' guat ca', chi'e chnabi'e txen len Diosen'. Na' len' chnie' gualaz chio' lao Diosen'. <sup>35</sup> ¿De da' gwžon cont Criston' bich gacde' chio'? ¿Gwžon no da' mal da' gac checho? ¿Gwžon no yela' yaše' yela' zi' da' gac checho? ¿Gwžon no yela' xi'a che bene' chgue'e chio'? ¿Gwžon no yela' chbił chdon checho? ¿Gwžon cate' bi de xalana'cho? ¿Gwžon še bi da' xož gac checho? ¿Gwžon še za' no

bene' gote' chio'? Bibi de da' gwžon cont Criston' bich gacde' chio'.

<sup>36</sup> Chac can' nyojczy Xtiža' Diosen' žan:

Xanto' Dios, da' chejnilaže'to' le' nita' bene' chesaclaže' yesote' neto'  
do ža do yel.

Chesone' xbab nacto' ca to xila' be yesote'.

<sup>37</sup> Na' la'czla' yogo' da' mal ca' za'ac len chio', bi chac chop laže'cho, san chebechgüecho le nezecho zoaczy Criston' chacde' chio'. <sup>38</sup> Neda' nezda' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ne yela' mbanna', ne no angl, ne no da' xigüe', ne no bene' gwnabia', ne da' chac checho na'a o bichle da' za'za'. <sup>39</sup> Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede' catec chacde' chio' dan' gwsele' Xancho Jesucriston' beque'e xtola'chon'.

### Diosen' gwque'e bene' Israel ca' ca xi'ine'

**9** <sup>1-2</sup> Neda' naca' txen len Criston' na' choa' diža' li, bi chonlaža', chnia' chacyaše'chgüeda' na' chacchgüeda' lo' lažda'ogua' che bene' gualaž chia' bene' bi chesejnilaže' Criston'. Spiritw che Diosen' chaclenen neda' cont nezda' diža' lin' choa'. <sup>3</sup> Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaž chia' ca' yesejnilaže' Criston'. Chacda' legaque', le gosalje' zjanaque' bene' Israel ca neda'. <sup>4</sup> Diosen' gwque'e xoxxtao' neto' bene' Israel ca xi'ine', na' gwzoe' len legaque' lo' be'ni' juisyw. Na' gwne' gaclene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'. <sup>5</sup> Bene' gole blao bene' za' che'ełte gosaque' xoxxtao' neto' bene' Israel. Na' lo diaža chegaque'na' golje Criston' ben' gwseła' Diosen'. Criston' lecze naque' Dios na' chnabi'e yogo'te benach, yogo'te beyixe' na' yogo'lol bichle da' de yežlio nga na' gate'teze. Cheyala' gonxenchone' toli tocane. Na' can' gonščaczcho.

<sup>6</sup> Na' bi cheyala' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža che da' Israelen' na Diosen' nacto' bene' Israel, le gague yogo'to' chejnilaže'to'ne'. <sup>7</sup> Na' gague yogo' neto' goljto' lo diaža che da' Abrahanna' nacto' dogualje xi'in diaža che', le gague yogo'to' chejnilaže'to' Diosen' can' gwyejnilaže' da' Abrahanna' le'. Quinga gož Diosen' Abrahanna' cani', gwne': "Xi'in diaža che da' Isaaquen' gona' cuent lo diaža chion'." <sup>8</sup> Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosalje' lo diaža che bene' Israelen', san bene' chesejle'e gon Diosen' gac chegaque' can' že' con can' gwyejle' da' Abrahanna', legacze' zjanaque' xi'ine' na' zjanaque' xi'in diaža che da' Abraham. <sup>9</sup> Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol chio' Sara ni."



<sup>10</sup> Na' gague da' na'zen', san lec ca' Diosen' be'e diža' che xi'in da' Rebecan' bin' gosac choptebe' xi'in da' xozxta'oto' Isaac. <sup>11-12</sup> Cate' bina' yesalje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabia'be' lebe'." Gwne' ca' cont nezecho chbeje' bene' gac güen chegaque', gague lagüe da' chesone' bi da' güen, san cont gac can' chnalažen'. <sup>13</sup> Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

<sup>14</sup> Bi cheyała' goncho xbab Diosen' cbi chone' da' zej to lica dan' chone' ca'. Zejcze' to lica. <sup>15</sup> Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'." <sup>16</sup> Diosen' chbeje' bene' cont yeyaše'laže'de' le', gague can' chaclaže' benachen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'. <sup>17</sup> Na' Xtiža' Diosen' nyojen can' gože' bene' gwnabia' che Egipton', gwne': "Neda' bena' naco' rey cont chlo'eda' bene' yela' guac chia' da' chona' len le'. Chonan' cont yeseneze bene' že' doxen lo yežlion' zoa' chnabi'a." <sup>18</sup> Can' naquen, Diosen' cheyaše'laže'de' con non' chazlaže' yeyaše'laže'de', na' lecze bene' zjanaque' bene' güedenag, lecze chazlaže' gone' legaque' bene' güedenag.

<sup>19</sup> Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' benach. ¿Bixchen' že' de xtoła'chon' še ca'?"

<sup>20</sup> Perw čno nac chio' benach gacyožlencho Diosen'? Ca to no yeso' xguague bi gac yen' bene' ben len: "¿Bixchen' beno' neda' quinga?"

<sup>21</sup> Bene' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

<sup>22</sup> Na' bi nacho chon Diosen' con can' chazlaže' len chio' benach yogo' ni'a, nžie' bia' gwnežjue' castigw toli tocane che bene' ca' bi chosozenag che', na' nape' yela' guac cont gone' ca'. Perw chzoede' sša chape' yela' chxenlaže' len legaque' na' gague la' sela'te' legaque' lo yi' gabilen' la'czla' zjazaque' yesebiaye'e. <sup>23</sup> Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'. <sup>24</sup> Chion' ba gwleje' gac güen checho balcho naccho bene' Israel na' balcho bi naccho bene' Israel. <sup>25</sup> Can' ža le'e libr dan' bzoj Oseas ben' be' xtiža' Diosen' cani', žan:

Bene' ca' bi zjanaque' yež chia', neda' Dios nia' legaque' yež chia', na' bene' ca' bi gocda', yapegaca'ne' chacda' legaque'.

<sup>26</sup> Na' yež gan' gož Diosen' bene' ca': "Bi nacle yež chia'", na'teze Dios ben' zoa toli tocane ye'e legaque' xi'ine'.

<sup>27</sup> Na' Isaías ben' be' xtiža' Dios cani' gwne' quinga che da' xoxxtao' neto' bene' Israel: "La'czla' chio' bene' Israel šancho ca yox da' chi' cho'a nisdao', bał gacho šjayzoacho len Diosen'. <sup>28</sup> Le Diosen' gone' can' ba nchoglagüen' len chio' benach, na' bedao'nez gone' doxen can' ba ngüie' gone'." <sup>29</sup> Gac can' ža yeto da' bzoj Isaíasen' cani', žan:

Šaca' Xancho Diosen' ben' nape yela' guac xen bi bocua'ane' to chope bene' lo nación Israel chechon',  
ba gwžiyi'cho can' gosac che bene' Sodoma na' bene' Gomorra ca'.

### Bene' Israel bene' bi chesejnilaže' Criston'

<sup>30</sup> Quinga ba goc, bene' bi zjanaque' bene' Israel bi besyeyiljue' nacle yesone' cont Diosen' ne' zjanaque' bene' güen len le', perw bale' ba chesejnilaže' Criston' na' da'nan' ba zjanaque' bene' güen len Diosen'.

<sup>31</sup> Na' zan bene' Israel gualaž cheto' zjano' to ley da' chžian bia' naclen' yesone' cont yesaque' bene' güen len Diosen'. Perw bi zjanaque' bene' güen len le', le bi chesone' doxen can' žanna'. <sup>32</sup> Na' bi goc yesaque' bene' güen len Diosen', le gosacde' yesone' da' güen cont yesaque' bene' güen len le' na' bi gosacbe'ede' con bene' yesejnilaže'ne' yesaque' bene' güen len le'. Goc chegaque' ca chac che bene' jati'i to yej. <sup>33</sup> Quinga nyoj Xtiža' Diosen' chegaque':

Gan' nzi' Sión sela' to bene',  
na' bena' zaca'lebe' ca to yej da' chego' bene' na' ca to yej xen da'  
šjati'i bene' na' bixe',  
le bene' zan bi yesejnilaže' ben' sela'.  
Na' note'teze' yesejnilaže' bena' selan', gwbat yesyetinjde' che dan'  
gosejnilaže'ne'.

**10** <sup>1</sup> Bene' migw, lo' lažda'ogua' che'nchgüeda' bene' Israel gualaž chia' yesejnilaže' Jesucriston' cont gata' yela' mban chegaque' toli tocanē, nachen' chol güiža' Diosen' chnaba' gaclene' legaque'.

<sup>2</sup> Nezda' da' zan da' chesone' chesacde' yebe Diosen' legaque', perw bi chesacbe'ede' bin' chazlaže' Diosen'. <sup>3</sup> Bi chesejni'ide' cheyala' yesejnilaže' Criston' cont yesaque' bene' güen, san chesyeyiljue' bi da' güen da' yesone' chesacde' cont yesaque' bene' güen len le'. Da'nan' bi chesejnilaže' Jesucriston' can' chaclaže' Diosen' yesone'. <sup>4</sup> Le yogo' bene' chesejnilaže' Criston' ba besyeyaque' bene' güen len Diosen'. Na' chio' chejnilaže'chone' ba nezecho nono gac gonyane' can' ža ley dan' bzoj Moisésen', neca gac yeyaque' bene' güen da' na'ogüe' lezen.

<sup>5</sup> Da' Moisésen' bzoje' can' cheyala' gon bene' cont gaque' bene' güen len Diosen', gwne': "Note'teze bene' chone' cayanen' ža ley na', nachen' guac bane' toli tocanē." <sup>6-7</sup> Na' chio' ba naccho bene' güen len le' da' chejnilaže'chone', na' bich choncho xbab nacho: "¿No gac cue yaban' na' no gac yetj gan' že' bene' guaten'?" šaca' nacle goncho šjaxi'cho Criston' cont gaclene' chio'. <sup>8</sup> San diža' güen da' chyixjue'eto' žan: "Ba nombia'cho

diža' da' chaclenen chio'. Choncho xbab che len na' choe'cho diža' can' žan." Len'na' diža' da' chyixjue'eto' bene' cont yesejnilaže' Jesucriston'.<sup>9</sup> Che'to' bene': "Še güe'lenle bene' diža' cont yesenezde' chejnilaže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bechis bosbane' Jesucriston' ladjo bene' guaten', nachen' gata' yela' mban chele toli tocanē." <sup>10</sup> Le cheyala' šejle'cho lo' yichjlažda'ochon' cont yeyaccho bene' güen len Diosen' na' lecze cheyala' güe'lencho bene' diža' che dan' chejnilaže'cho Criston' cont gata' yela' mban checho toli tocanē.

<sup>11</sup> Xtiža' Diosen' nyojen žan: "Note'tez bene' yesejnilaže' Diosen', gwbat yesyetingde' che da' gosejnilaže'ne'." <sup>12</sup> Balcho naccho bene' Israel na' balcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'lol bene', na' cheyaše'laže'de' note'tezcho chnabcho gaclene' chio'. <sup>13</sup> Can' gwne': "Note'tez bene' yesenabe' gaclena' legaque', neda' naca' Xanle yebeja' legaque' lo da' malen'." <sup>14</sup> Na' čnacxe yeson bene' yesenabe' goclen lagüen' še bi chesejnilaže'ne'? Na' čnacxe yesone' yesejnilaže'ne' še biča' yesende' xtižen'? Na' čnacxe yesende' xtižen' še nono zoa no güe'lene' legaque' xtižen'? <sup>15</sup> na' čnacxe yeson bene' yeseyixjue'ede' xtiža' Diosen' še Diosen' bi sele' legaque' yeseyixjue'eden'? Chac can' nyoj Xtiža' Diosen' žan: "Chbechgüecho caten' za'ac bene' cheseyixjue'ede' diža' güen chosozejni'ide' guac soacho binlo len Diosen'."

<sup>16</sup> Perw gague yogo' bene' gualaž cheto' chosozenague' diža' güen che Diosen'. Chac can' gwna Isaías ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'." <sup>17</sup> Bia'cze cheyala'cze yesene bene' diža' güen da' chzejni'in che Criston' cont yesejnilaže'ne'.

<sup>18</sup> Na' chnaba': čbiča' yesene bene' Israel gualaž cheton' diža' güen da' chzejni'in che Criston'? Bačh gosenden'. Chac can' nyoj Xtiža' Diosen' žan:

Bene' že doxen lo yežlion' ba gosende' xtižen';  
ba zej xtižen' doxen.

<sup>19</sup> Na' chnaba' da' yoble: čbi gosejni'i bene' Israel gualaž cheton' diža' dan' chzejni'in che Criston'? Ba gosejni'iczden'. Le da' Moisésen' bzoje' da' gwna Diosen' chegaque', žan:

Neda' Dios gona' güen len bene' bi zjanac bene' nación chia', na' gue'ele legaque'.

Na' gona' güen len bene' nación ca' bene' bi chesejni'i, na' ža'ale.

<sup>20</sup> Nach Isaíasen' ben' be' xtiža' Diosen' cani' bi bžebe' gwduxjue'ede' da' nga gwna Diosen', žan:

Bene' bi besyeyiljw neda', besyeželde' neda'.

Na' bene' bi gosenab neda', blo'elagua' legaque'.

<sup>21</sup> Na' Diosen' gože' bene' Israel gualaž cheton', gwne': "Yogo' ni'a chneyoeda' le'e cont gwzenagle chia', na' zoachachle chonle güedenag len xtižan'."

### Baḷ bene' Israel yesejnilaže' Jesucriston'

**11** <sup>1</sup> Bi cheyaḷa' goncho xbab Diosen' bechojlaže' nación Israel cheto' to ši'ize. Neda' naca' bene' Israel, golja' lo diaža che da' Abraham na' naca' diaža che da' Benjamín. <sup>2</sup> Biḅa' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elías ben' be' xtiža' Diosen' cani', gwdagüe' xya che da' xozxta'oto' ca', gože' Diosen': <sup>3</sup> "Xana', bene' gualaž chia' quinga ba gosote' bene' ca' goso'e xtižon', na' ba bosyochinje' mes de yej ca' gan' cheyaḷa' yesonxene' le'. Yetoga neda' zoa' chzenaga' chio' na' lencze neda' chese'nde' yesote'." <sup>4</sup> Nach Diosen' boži'e xtižen' gože'ne': "Ne' nita' gaže mil bene' ba gwleja' bene' biḅa' yosozoa xibe' yesonxene' ḷ gua'a ḷsaca' dan' nzi' Baal." <sup>5</sup> Na' ca'cze naquen ža na'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxento'ne', le nži'ilaže'de' neto'. <sup>6</sup> Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' chon Diosen' neto' lo yela' bene' šagüe' che' cate' chbeje' neto' še ca', san naquen to goclenze.

<sup>7</sup> Zan bene' nación Israel cheton', la'czḷa' chesonchgüe' da' chesacde' cheyaḷa' yesone', bi chesyeželde' naclen' yesone' cont yesaque' bene' güen len Diosen'. Perw Diosen' gwleje' baḷto' cont šejnilaže'to'ne' na' none' neto' ca to bene' güen. Na' bene' yezica'chle zjanaque' güedenag len Diosen'. <sup>8</sup> Chac chegaque' can' nyoj Xtiža' Diosen' žan: "Diosen' bene' cont zjanaque' ca bene' bicze nte. Na' ža na'aža zjanaque' ca to bene' bi chle'e len yejlagüen', na' ca to bene' bi chene len naguen'." <sup>9</sup> Na' da' Davin' gwne' chegaque':

Yogo' da' de da' chesyebede' yesaquen ca to da' yeben ḷegaque', na' yesaquen ca to ga šjaselažoe' yesaque' castigw.

<sup>10</sup> Yesechol yichjlažda'ogaquen', na' yedote yesezaca'zi'e can' chzaca'zi' ben' nḷegw cože' no'e yoa' zi'i.

### Diosen' gwleje' baḷ bene' bi zjanac bene' Israel cont chesejnilaže'ne'

<sup>11</sup> Nezczecho zan bene' Israel gualaž cheton' bi chesejnilaže' Criston'. Na' chnaba', žzjanaque' ca bene' gwyo'o yeja' ni'e? žše zjanaque' ca bene' gwbiže' na' gote'? Zjanaque' ca to bene' con gwyo'o yeja' ni'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'nan' ḷegaque' gwžin ža yesezelaže' gon Diosen' güen len ḷegaque' ca ba chone' len le'e bi nacle bene' Israel. <sup>12</sup> Da' yoble chnia', da' bi chesejnilaže' bene' gualaž cheto' ca' Criston', chac ca' cont yezica'chle

bene' že' yežlion' yesenite' mba con še yesejnilaže'ne'. Na' da' bchoj nación Israel cheton' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž cheto' yesenite' yesejnilaže' Diosen', na' cana'ch gac mba juisyw.

<sup>13</sup> Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' che Diosen'. <sup>14</sup> Le chaclaža' gona' cont bene' gualaž chia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban chegaque' toli tocane. <sup>15</sup> Diosen' ba bnite' zan bene' Israel gualaž cheton' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž cheto' len le'. Na' leca mba gac cate' yesyebigue' len Diosen'. <sup>16</sup> De costumbr che neto' nacto' bene' Israel cate' chonto' yetextil, na' chnežjwto' Diosen' to bloł dao' cuazin' cont chlo'eto'ne' doxenen naquen che'. Na' lecze še nacho to loe yaguen' naquen che Diosen', zejen lecze xoze' yaguen' naquen che'. Na' da' xozxta'oto' ca' ben' gosejnilaže' Diosen' cani' zjazaca'lebde' ca bloł dao' cuazina' na' ca' loe yaguen'.

<sup>17</sup> Nación Israel cheton' zaca'leben ca xoze' yag da' ba nchog xan yaga' to lao yag olivo güen na' ba bniten' šla'ale. Na' le'e bi nacle bene' Israel zaca'leble ca xoze' yag olivo da' ze do yixe', da' ba gwchogue' lagüen na' ba bozoen' yag güen cont beyaquen toze. Nach guac nacho loe yag güenna' ba noxen' le'e na' niže' chenna' chac banlenle. <sup>18</sup> Bi gaquele naquechle bene' güen ca bene' Israel gualaž cheto' da' chac chele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

<sup>19</sup> Le'e bi nacle bene' Israel, šeca che'lja lježle: "Diosen' bene' bene' Israel ca yag da' gwchogue' xozen' cont goc bozoe' chio' gualaz legaque'." <sup>20</sup> Da' li can' žalen'. Perw da' bi gosejnilaže' Criston', Diosen' bene' len legaque' ca xoze' yag da' ba gwchog xan yaguen' len, na' ba bozoe' le'e lagüe da' chejnilaže'le Criston'. Da'nana' bi ga'laže'le, san le gwsaca' cont soachachle šejnilaže'lene'. <sup>21</sup> Da' bi gosejnilaže' Criston', Diosen' bene' cont gwdi gwxaca' bene' Israel gualaž cheto' ca' bene' zjazaca'lebe' ca xoze' yag güenna', na' lecze ca' gone' saca'zi'le še bi soachachle šejnilaže'lene'. <sup>22</sup> Le gonšc xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soachachle šejnilaže'lene' cont bi gone' saca'zi'le can' ba bene' len bene' Israel gualaž cheton' bi gosejnilaže'ne'. <sup>23</sup> Na' Diosen' yebede' si' lo ne'e bene' Israel gualaž cheto' ca' cate' yesejnilaže'ne', le nape' yela' guac cont yozoe' legaque' binlo len le', nach yesaque' ca xoze' yag da' bezyone' toze len yag chen da' yoble. <sup>24</sup> Le'e nacle ca xoze' yag olivo da' ze yixe', Diosen' gwchogue' le'e na' bozoe' le'e lo xoze' yag güen la'czla' bi nacle dogualje xozen'. Na' naquechxe yebede' yozoe' bene'

Israel gualaž cheto' ca' le'e yaguen' da' yoble bene' ca' zjazaca'lebe' ca dogualje xoze' yaguen'.

### **Beñe' zan beñe' Israel yesyeyaque' lo na' Diosen'**

<sup>25</sup> Beñe' migw, che'nda' šejni'ile da' nga da' nono na' neze cont bi ga'laže'le gaquele zaca'chle clél ca beñe' Israel gualaž cheto' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'. <sup>26</sup> Nach gwžin ža yogo' bene' Israel gualaž cheto' ca' yesenita' yesaque' lo na' Diosen'. Gac can' nyoj Xtiža' Diosen' žan:

To beñe' choj lo ciuda Sión yebeje' le'e lo da' mal da' chonle, le'e za'le lo diaža che da' Jacob.

<sup>27</sup> Na' cate' žin ža yeca'a xtola'len', cana'ch ba goc can' ba gwnia' gona'.

<sup>28</sup> Dan' bi chesejle' zan beñe' Israel gualaž cheton' diža' güen che Diosen', da'nan' ba bzoe' šla'ale nación cheton' na' ba gwleje' le'e bi nacle beñe' Israel cont chejle'le che'. Perw na' Diosen' ne' chacde' beñe' ca', le gwleje' da' xozxta'oto' ca' cont yesaque' nación che'. <sup>29</sup> Na' Diosen' bi chetinjde' che bene' mbeje' yesaque' nación che', neca chetinjde' che goclen da' chone' len beñachen'. <sup>30</sup> Cana'te le'e bi bzenagle che Diosen' na' da' bi gosaclaže' bene' Israel gualaž cheton' yosozenague' che', nach beyaše'laže' Diosen' le'e na' goclene' le'e cont chzenagle che'. <sup>31</sup> Na' da' bi chosozenag beñe' Israel gualaž cheto' ca' che Diosen' na'a, chac ca' cont žin ža gwlo'e Diosen' ne' cheyaše'laže'de' legaque' can' cheyaše'laže'de' le'e. <sup>32</sup> Diosen' ba gwchoglagüe' che yogo' beñachen' de xtola'gaque' da' bi chosozenague' che', na' ba bene' ca' cont lecze gwlo'ede' cheyaše'laže'de' yogo'cze'.

<sup>33</sup> Leca beñe' sina' Diosen'. Nezczede' yogo'lol. Gwbat šejni'icho da' nžie' bia' gac o da' nžie' bia' gone' lo yeła' sina' che'. <sup>34</sup> Nyoj Xtižen' žan: "Nono neze yogo' xbab che Xancho Diosen'; nono nape yeła' sina' cont gwzejni'ide' le' can' cheyała' gonen'. <sup>35</sup> Na' nono cheyała' gon xbab yebi' Diosen' güen len le' še bi da' ba be'ene'." <sup>36</sup> Yogo'lol da' de naquen che Dios. Bene' beñach, beyixe' na' bica'chle da' zjade. Na' lagüe yogo'lol da' bene' zoe' blao. Len' gacxene' toli tocane. Can' gacšca.

### **Cheyała' gon cuincho lo na' Diosen'**

**12** <sup>1</sup> Beñe' migw, Diosen' ba cheyaše'laže'de' chio'. Da'nan' chneyoeda' le'e le gon doxen cuinle lo na' Diosen' na'a mbanle. Le gonen do yichj do laže'le. Na' le gac beñe' laždao' xilaže' le can' chazlaže' gonxenchone'. <sup>2</sup> Bi goncho ca cheson beñe' bi zjanombia' Diosen'. San cheyała' nabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to licha.

<sup>3</sup> Diosen' nži'ilaže'de' neda' na' ba gwsele' neda' cont chyixjue'eda' xtižen'. Da'nana' chnia' bi cheyała' gonxen cuincho, san cheyała' gacbe'echo Diosen' ba goclene' chio' cont chejnilaže'chone' na' none' grasyw checho cont goncho bi da' goncho. <sup>4</sup> Can' nac cuerp chechon', zan cuen naquen na' gague toze žin da' cheson to to cuenen. <sup>5</sup> Lecze can' naquen len chio', bene' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

<sup>6</sup> Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheyała' chixjue'echon na' šejle'cho gaclene' chio' gonchon. <sup>7</sup> Na' še Diosen' ba none' checho gaclencho bene', cheyała' gaclencho legaque'. Na' še ba none' checho gwsed gwlo'echo bene', cheyała' gwsed gwlo'echone'. <sup>8</sup> Na' še Diosen' ba none' checho neyoecho bene' cont yesone' da' güen, cheyała' neyoechone'. Na' še ba none' checho gwnežjwcho da' chyažje bene', cheyała' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheyała' cue' yichjcho güia na'cho legaque'. Na' še ba none' checho yeyaše'cho no bene' yaše', no bene' gole o no bene' güe', cheyała' yebecho gaclenchone'.

### Da' cheyała' gon chio' chejnilaže'cho Jesucriston'

<sup>9</sup> Cheyała' gague ljež benachcho do yichj do laže'cho, na' cheyała' gue'echo da' malen' na' soaczcho goncho da' nac da' güen. <sup>10</sup> Ca chaque biše' goljcho, ca'cze cheyała' gaguecho note'teze bene' lježcho na' gonchone' bene' xench ca cuincho.

<sup>11</sup> Bi gaccho bene' xagüed, san goncho da' non Diosen' chio' goncho do yichj do laže'cho, le chonxencho Xancho Jesucriston' len dan' chonchon'.

<sup>12</sup> Cheyała' yebecho da' nezecho šjayzoacho len Diosen'. Cheyała' gwyo gwchejcho cate' chyí chzaca'cho. Na' lecz cheyała' yol güižcho Diosen' zan ni'a yogo' ža.

<sup>13</sup> Cheyała' gaclencho bene' lježcho bene' chesejnilaže' Diosen' še bi da' cheseyažjde' na' gwlebcchone' ližcho še zjanaque' bene' zito'.

<sup>14</sup> Cheyała' nabcho lao Diosen' gac güen che bene' chosoči chososaca' chio'. Nabcho gac da' güen chegaque', gague da' mal.

<sup>15</sup> Cheyała' yebecho txen len bene' chesybe na' cuežcho txen len bene' chesebež.

<sup>16</sup> Yogo'cho cheyała' goncho toze xbab. Bi cheyała' ga'laže'cho, san yol güižcho bene' yaše' bene' bibi chac na' bi gon cuincho bene' sina'.

<sup>17</sup> Še bi da' mal chone bene' chio', bi nacho lecze da' mal yebi'icho len le'. Cheyała' cue' yichjcho goncho da' güen cont yesena bene' le naczen güen dan' chonchon'. <sup>18</sup> Cheyała' goncho bi da' gac goncho cont soacho binlo len yogo'lol bene'. <sup>19</sup> Chacda' le'e, nachen' chnia' cheyała' gwdecho to šla'ale bite'teze da' chesone bene' chio'. Diosen' gwyoecze' nac gone' len bene' chosoči chososaca' chio'. Xtižen' nyojen žan: "Xancho Diosen'

že': Neda' yoži'a che da' mal da' chesone', na' neda' gwnežjua'ne' castigw." <sup>20</sup> Na' lecze žan: "Še chbil chdon bene' chgue'ede' chio', cheyała' güe'chone' da' ye'ej gagüe'; le še goncho güen len le', guacbe'eljede' chone' da' mal." <sup>21</sup> Bi güe'cho latje nabia' da' malen' chio' na' yebi'icho mal len bene' chonde' chio' mal, san yebi'icho güen len legaque' cont yesyetingde' che da' malen' chesonen'.

**13** <sup>1</sup> To tocho cheyała' gwzenagcho che justis bene' chesenabia', le Diosen' bnite' legaque' chesenabi'e. <sup>2</sup> Še bi chzenagcho che bene' chesenabia', bi choncho da' nžia bia' Diosen' goncho, na' lecze chyiljwze xtola'cho na' gaccho castigw da' bi chzenagcho chegaquen'. <sup>3</sup> Bi cheyała' žebcho bene' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaque', con soacho goncho da' güen da' yesyebede'. <sup>4</sup> Justis ca' chesone' xšin Dios cont soacho güen. Perw še choncho da' xinj, cheyała' žebcho legaque', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal. <sup>5</sup> Da'n'an' cheyała' gwzenagcho chegaque' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho. <sup>6</sup> Lecze da'n'an' cheyała' chixjwcho no che bien na' bichle da' cheyała' chixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho chegaque', le Diosen' ba bzoe' legaque' cont chesone' dan' cheyała' yesone'.

<sup>7</sup> Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuestw, chixjwchon. Na' gapcho bala'an' bene' cheyała' dap bala'an'. Na' gonxencho bene' cheyała' gacxen.

<sup>8</sup> Cheyała' chixjwcho doxen bi da' čala'cho che bene', na' lecze cheyała' gague yogo' ljež benachcho, le še chaquecho legaque', ba choncho da' non ley che Diosen' mandadw goncho. <sup>9</sup> Leyna' žan: "Bi gata'lenle no'ole bi nac no'ol chele o bene' byo bi nac bene' chele, bi gotle bene', bi cuanle, bi güe'le diža' güenlaže' che bene' lježle, bi selaže'le bite'teze da' de che bene'." Na' dech da' ža leyna'. Na' yogo'cze da' nžia bia' leyna' goncho, bač chonchon še chzenagcho che dan' žanna': "Le gague ljež benachle ca chaque cuinle." <sup>10</sup> Še chaque lježcho, bibi da' mal gonechone'. Da'n'an' choncho doxen can' nžia bia' leyna' še ba chaque lježcho.

<sup>11</sup> Caten' gwzolaocho chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'n'an' bich cheyała' gaccho ca bene' chtas, bene' bi chon xbab. <sup>12</sup> Yežlio nga zaca'leben ca ga nac chol, le že'chgua bene' cheson da' xinj; san gan' zoa Diosen' naquen' ca ga yo'o be'ni'. Nach cheyała' cuejyichjcho bich goncho da' xinj na' goncho con da' chazlaže' Diosen', le ba zoa yide' Criston' yedyexi'e chio'.

<sup>13</sup> Cheyała' goncho da' güen, le ba yo'o be'ni' che Criston' lo'



yichjlažda'ochon'. Bi cheyala' goncho txen lo lnin' ga chbe' žaš, bi cheyala' gaccho borrašw, bi cheyala' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto', na' bi cheyala' tillen lježcho o gue'echo bene'. <sup>14</sup> Cheyala' gon cuincho lo na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi nabian' chio'.

**Toz Diosen' nezde' še bene' lježcho nape' dola'**

**14** <sup>1</sup> Še zoa to bene' ba chejnilaže' Criston' na' bina' šejni'ide' nac cheyala' gone', con zoe' chacžejlaže', le gwlebe' gaque' txen len le'e, perw bi gacyožlenlne' che xbab chen'. <sup>2</sup> Nita' bene' chesejnilaže' Diosen' chesacde' bi zjanape' dola' da' chesagüe' bite'teze yela' guagw, na' lecz nita' bene' yoble bina' yesejni'ide' bite'teze da' ye'ej gagwcho naquen güen lao Diosen'. Da'nan' chesacde' bi cheyala' yesagüe' bela' na' chesagüe' yixe' cuanze. <sup>3</sup> Ben' chagw bite'teze yela' guagw bi cheyala' gue'ede' ben' bi chagüe' bela', na' ben' bi chagw bela' bi cheyala' ne' che ben' chagüe' bela', le Diosen' ba none' chopte' ca xi'ine'. <sup>4</sup> ¿Noxe nac chio' gwlaže' checho še nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

<sup>5</sup> Nita' bene' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' bene' chesacde' toz ca zaca' yogo' ža ca'. To tocho cheyala' soacho do yichj do laže'cho goncho da' chejni'icho cheyala' goncho. <sup>6</sup> Bene' cheson xbab de ža da' zaca'ch ca ža ca' yezica'chle, chesebeje' žan' cont chesonxene' Dios. Na' bene' chesacde' toz can' zaca' ža ca', lecze chesonxene' Diosen' chesone' xbaben' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxclen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yela' choxclen che'.

<sup>7</sup> Ne tocho bi yo'o lo na'cho gwžiacho bia' can' soa cuezcho šlaque mbancho, na' neca yo'o lo na'cho gwžiacho bia' nac gatcho. <sup>8</sup> Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ocho lo na' Xancho'. <sup>9</sup> Cuin Xancho Criston' gote' na' beyas bebane' ladjo bene' guat ca' cont naque' Xan yogo' bene' chesejnilaže'ne' bene' zjamban na' bene' ba gosat.

<sup>10</sup> Bi cheyala' nacho che bene' lježcho zjanape' dola' še bi da' chesone', na' bi cheyala' gue'e lježcho. Yogo'czechu techo lao Criston' cont le' chogbi'en checho še de xtola'cho o še bibi de. <sup>11</sup> Nyojczu Xtiza' Diosen' žan:

Xancho Diosen' že':

Da' li naca' Dios, zoa' mbana',

na' yogo' bene' yedesezoa xibgaque' laguan',  
na' yogüe' yesene' toz neda' zaca' yesonxen benach.

<sup>12</sup> Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

### Bi goncho da' gwžigan' bene' lježcho gone' da' mal

<sup>13</sup> Da'nan' chnia', bi cheyała' necho che bene' lježcho neche bi da' chesone'. Da' cheyała' yechoglaže'cho goncho, cuejyichjcho bi da' choncho še len chžigan' note'teze bene' lježcho gone' da' xinj o še len chonen ca šjabix šjalažoe'. <sup>14</sup> Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še bene' chone' xbab gape' doła' lagüe da' gagüe' to da' gagüe', naquen mal gagüen' še ca'. <sup>15</sup> Še bene' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezchon. Criston' bnežjw cuine' gote' neche bene' lježchon', na' chio' bi cheyała' gagwcho bi da' gonen cont gac choplaže' bene' lježchon' cuejyichje' Criston' na' cuiaye'e. <sup>16</sup> Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj. <sup>17</sup> Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'. <sup>18</sup> Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

<sup>19</sup> Da'nan' cheyała' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'chache' yesejnilaže' Criston'. <sup>20</sup> Diosen' ba bnitlagüe' xtoła' bene' lježcho na' bi cheyała' gagwcho da' gonen gac choplaže' no bene' lježcho na' gone' da' chacde' naquen mal. Nezda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho.

<sup>21</sup> Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'. <sup>22</sup> Še nezecho zoacho binlo len Diosen' da' chejnilaže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho. <sup>23</sup> Na' de xtoła'cho še chagwcho to yela' guagw na' chacžejlaže'cho chaquecho bilja cheyała' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

**Cheyala' cue' yichjcho bene' lježcho**

**15** <sup>1</sup> Balcho ba zoachachcho chejnilaže'cho Criston' na' nezecho de latje ye'ej gagwcho bite'teze. Perw cheyala' gapcho yela' chxenlaže' len bene' bina' yesejni'išagüe'de', na' bi goncho con da' žan checho. <sup>2</sup> To tocho cheyala' goncho bi da' güen da' chazlaže' bene' lježcho ca' goncho, cont gaclenen legaue' yesejnilaže'che' Diosen'. <sup>3</sup> Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'." <sup>4</sup> Na' Xtiža' Diosen' da' bosozoj bene' cani' chzejni'in chio' cont gwyo gwchejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. <sup>5</sup> Diosen' chone' chio' yela' chxenlaže' cont chyo chchejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesúsén'. <sup>6</sup> Na' gone' ca' cont toze can' nale gonxenle Dios ben' nac Xa Xancho Jesucriston'.

**Diosen' chaclaže' bene' bi zjanac bene' Israel yesonxene' le'**

<sup>7</sup> Da'nan' cheyala' le'e to to bene' lježcho binlo ca Criston' chle'ede' to to chio' binlo, chio' chejnilaže'chone'. Goncho ca' cont gacxen Diosen'. <sup>8</sup> Can' goc len Cristo Jesúsén', bzexjw yichje' ben cuine' ca to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xozxta'oto' ca' gone' güen len legaue'. <sup>9</sup> Na' lecze bid Criston' cont le'e bi nacle bene' Israel lecze gonxenle Diosen' da' ba beyaše'laže'de' le'e. Chac ca nyoj Xtiža' Diosen' dan' žan:

Da'nan' gua' yela' choxclen chio' gan' že bene' bi zjanac bene' Israel, gola' gonxena' le'.

<sup>10</sup> Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto' nación che'.

<sup>11</sup> Na' lecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le güe' diža' che yela' gwnabia' che'.

<sup>12</sup> Na' da' Isaías ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diaža che da' Isaí.

Le' nabi'e bene' že' to to yež na' to to nación,

na' bene' ca' bi zjanac bene' Israel yesebeze' gaclene' legaue'.

<sup>13</sup> Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuezle binlo len xbab da' yo'o yichjlažda'olen' da' zoale chejnilaže'le Criston'. Gonšque' ca' cont Spiritw che Diosen' gaclenen le'e soachachle yebele da' nezele šjayzoale len le'.

<sup>14</sup> Bene' migw, nezda' ba nacle bene' šagüe' bene' chon da' güen, na' nezda' chejni'ichgüele na' chac chneyoe lježle. <sup>15</sup> Pero le'e cart nga ba beyaxjda' gwdila' le'e cont gonchle xbab, le Diosen' beži'ilaže'de' neda' gwleje' neda'. <sup>16</sup> Gwleje' neda' cont chyixjue'eda' xtižen' len bene' bi zjanac bene' Israel. Na' Diosen' yebede' da' ba goclena' legaque' cont bale' gosejle'e xtižen' na' gosaque' lo ne'e cate' Spiritw chen' benen lažda'ogaquen' xilaže'.

<sup>17</sup> Chbeda' chona' xšin Diosen' da' ba goclen Cristo Jesús'en' neda' chona'. <sup>18</sup> Bi cheyaxjda' gua' diža' che bi da' ba ben bene' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'. <sup>19</sup> Spiritw che Diosen' goclenen neda' cont bena' yela' guac na' bichle da' besyebane bene' gate'teze gwy'a be'lena' legaque' xtiža' Diosen', gwzologua' Jerusalén na' bžintia' gan' nzi' Ilírico. Na' ba gwdixjue'eda' xtižen' doxen gan' gwsele' neda'. <sup>20</sup> Na' ba bena' byen ba bia' diža' güen da' chzejni'in che Criston' gan' nono na' šejnilaže'ne', le bi chaclaža' tia' gwłana' xlatje bene' ba chosozejni'ide' xtiža' Diosen'. <sup>21</sup> Da'nan' chac can' nyoj Xtiža' Diosen' žan:

Bene' ca' bina' yesende' xtižen' yesombi'ene',  
na' bene' ca' bina' yesenezde' che' yesejni'ide' che'.

### Pablon' šeje' Roma

<sup>22</sup> Da' chzejni'ida' bene' ga yoble xtiža' Criston', da'nan' bi goc yida' gan' zoalen' la'czla' zan ni'a ba goclaža' yida'. <sup>23</sup> Cana'te zelaža' yedena'a le'e, perw na'ach ba beyož bena' da' gwlo'o Diosen' lo na' gona' do nga. <sup>24</sup> Nach cate' ša'a España cana' chacda' tia' yedena'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'. <sup>25</sup> Na'a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'. <sup>26</sup> Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'. <sup>27</sup> Bene' ca' bosotoben' besyebede' bosonežjue' mechon', na' naquen to goclen da' cheyała' yesone' len bene' Israel gualaž cheto' ca', le la'czla' legaque' bi zjanaque' bene' Israel, ba zjanone' chegaque' yogo' da' güen da' ba bzejni'i Diosen' neto' bene' Israel, na' da'nan' cheyała'cze yesaclene' bene' gualaž cheto' ca' len da' cheseyažjde'. <sup>28</sup> Cate' bačh beyož bena' lo na' bene' Jerusalén ca' mechon' bdooben', cana'ch sa'a ša'a Españan' na' tia' na'a le'e. <sup>29</sup> Na' nezda' Criston' gaclene' neda' la'a gan' zoalen' cont güe'lena' le'e diža' güen che' da' gaclenen yichjlažda'olen' na' soachguacho mba.

<sup>30</sup> Bene' migw, nezda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque lježcho tocho yetocho. Da'nan', bene' migw, chnaba' gacle neda' txen yol güižcho

Diosen' cont gaclene' neda'. <sup>31</sup> Nabechone' bi gaca' lo na' bene' gualaž cheto' ca' bene' bi chesejnilaže' Criston' Judean', na' lecze nabechone' cont bene' lježcho ca' že' Jerusalén bene' yo'o lo na' Diosen' yesazlaže' ca dan' güe'gaca'ne'. <sup>32</sup> Nach še Diosen' gone' latje, mbalaz yedena'a le'e na' yeyaclaža' soa' na' len le'e. <sup>33</sup> Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Cašcacze gac.

### Pablon' chguape' tiox bal bene' že' Roma

**16** <sup>1</sup> Chneyoeda' le'e le gon txen len bene' zanchó Febe cate' le'e gan' zoalen'. Ba benchgüe' xšin Diosen' len bene' ca' chesedop chesežag chesonxene' Jesucriston' lo yež Cencia. <sup>2</sup> Le gwlebe' ca cheyala' gonle len ljež chio' yo'ochó lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'. <sup>3</sup> Le gwguap tiox Priscila len bene' che' Aquila. Legaque' ba gosone' žin che Cristo Jesúsén' txen len neda'. <sup>4</sup> Besezanlaže' cuingaque' yesate' cont bososle' neda' lo na' yela' goten'. Choa' yela' choxcen chegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxcen chegaque'. <sup>5</sup> Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwejnilaže' Criston'. <sup>6</sup> Nach le gwguap tiox María no'olen' ba benchgua xšin Diosen' gan' zoalen'. <sup>7</sup> Na' le gwguap tiox bene' gualaž cheto' Andrónico len Junias. Legaque' byobch gosejnilaže' Criston' clel ca neda' na' txen gota'to' ližya. Lecz ca' postlw ca' yezica'chle cheso'e diža' güen chegaque'. <sup>8</sup> Le gwguap tiox bene' xmigua' Amplias, le chacda'ne' da' ba chejnilaže' Xancho Criston'. <sup>9</sup> Na' le gwguap tiox Urbano ben' chon xšin Criston' txen len chio', na' lecze Estaquis, le chacda'ne'. <sup>10</sup> Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox bene' ca' že' liž Aristóbulo. <sup>11</sup> Na' le gwguap tiox bene' gualaž chia' Herodión na' lecze bene' ca' že' liž Narciso, con noe' chesejnilaže' Criston'. <sup>12</sup> Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lecze le gwguap tiox bene' zanchó Pérsida. Chaquechone' da' ba benchgüe' xšin Xanchon'. <sup>13</sup> Na' le gwguap tiox Rufo. Naque' bene' blao len chio' chejnilaže'cho Xancho Jesucriston'. Na' lecze le gwguap tiox xne'ena', le ba none' neda' ca xi'ine'. <sup>14</sup> Le gwguap tiox Asíncrito, Flegonte, Hermas, Patrobas na' Hermes len bene' lježcho zjanita' len legaque'. <sup>15</sup> Na' le gwguap tiox Filólogo na' Julia na' len Nereo na' bene' zanen', na' Olimpás na' yogo' bene' lježcho nita' len legaque'.

<sup>16</sup> Na' cate' chežagle txen le gwnopa' na' lježle cate' chguap lježle tiox cont nacbia' chaque lježle. Na' bene' ca' chesedop chesežag chesonxene' Criston' yogo'te yež gan' ba gwy'a' chosoguape' le'e tiox.

<sup>17</sup> Bene' migw, chneyoeda' le'e le gwsaca' cont bi gwzenagle che bene' zjanac bene' güetil, bene' chesaclaže' gonle da' xinj, le bi chesone' txen len dan' ba bsdle che Diosen'. <sup>18</sup> Bi chosozenague' che Xancho Jesucriston' san chosozenague' che da' mal da' yo'o lo yichjlažda'ogaquen' na' chesone' con can' žanna'. Na' cheso'e diža' xdan chosopede' bene' chesejle'daze cont chesexoayague' legaque'. <sup>19</sup> Yogo'ze bene' zjanезде' chzenagle che bene' chosozejni'ide' le'e, na' danan' chbeda'. Perw chaclaža' gacle bene' sina' cont gwzenagle che da' nac da' güen, gague gwzenagle che da' nac da' mal. <sup>20</sup> Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' Xancho Jesucriston' soašque' gaclenšcace' le'e.

<sup>21</sup> Timoteo ben' chonlen neda' xšin Criston' nga chguape' le'e tiox, na' lecze ca' cheson bene' gualaž cheto' Lucio na' Jasón na' Sosípater.

<sup>22</sup> Neda' Tercio chzoja' cart nga con can' ža Pablon', na' lecze chguapa' le'e tiox, le naccho txen chejnilaže'cho Xanchon'.

<sup>23</sup> Lecze Gayo chguape' le'e tiox. Neda' Pablo zoa' liže' na' lecze liže' nga chesežag bene' ca' chesonxen Criston'. Na' lecze Erasto ben' nac lo ne'e mechw che ciudan' chguape' le'e tiox na' len bene' biše' Cuarto.

<sup>24</sup> Soašca Xancho Jesucriston' gaclenšque' yogo'le. Na' cašcace' gac.

### Chonxene' Diosen'

<sup>25</sup> Le gonxench Diosen'. Len' nape' yela' guac cont gaclene' le'e soachachle šejnilaže'lene' can' ža diža' güen da' chyixjue'eda' chzejni'ida' bene' che Jesucriston'. Na' chzejni'ida' xtiža' Diosen' da' nono na' neze cate' za' xete yežlion', <sup>26</sup> perw na'a Diosen' ba bzejni'ide' chio' bi zejen da' ca' none' mandadw bosozoj bene' ca' bosozoj Xtižen' cani'. Na' Dios ben' zoa toli tocanē chaclaže' šej diža' chen' yogo' yež cont yogo' chio' benach šejnilaže'cho Jesucriston' na' gwzenagcho che'.

<sup>27</sup> Toze Diosen' zaque' gonxen chio' benach, na' tozen' napchgüe' yela' sina'. Na' da' gwsele' Xancho Jesucriston' chaclene' chio', da'nan' chac chonxenchone' toli. Cašcace' gac.